



## Johresbricht Landfrauen Wasseramt 2019

Nach der GV fot üses Landfroue Jahr immer mit äm letschte Termin usem vergangene Herbst-/Winterprogramm a, nämlich äm Chegu- und Jassobe, wo mir z Lüsslige im Restaurant Bellvue wiederum e gemüetliche und gesellige Obe verbrocht hei, danke Silvia!

Von Zeit zu Zeit erinnert uns das Leben daran, dass unsere Lebenszeit etwas sehr kostbares ist.

Afangs Februar het üs die truurigi Nachricht vom unerwartete und plötzleche Tod vo üsem Vorstandsmitglied Yvonne Simon us Luterbach erreicht. Jetzt hei mir müesse gmeinsam stark si und e Wäg finge, um die Lücke z schliesse, wo d Yvonne hingerlo het. Dank äm solide Fundamänt von üsem Vorstand isch üs das einigermass glunge. Ou üses ehemalige Vorstandsmitglied us Deitige, s Pia Kofmel het üs s ganze Jahr düre ungerstützt und het mit äm Rita Kunz i dene zwöine Dörfer d Programm verteilt und Kursamäudige entgäge gno, viele Dank dene zwene Froue! Leider heimer aber bis hüt no kei Frou us Luterbach oder Deitige chönne gwünne wo mit üs im Vorstand würdi mitschaffe.

S Rad vor Zyt dräit sich witer und mir hei äs abwächsligrichs und interessants Frühlingsprogramm zämegschtöt wo uf reges Inträsse gstosse isch, heimer doch fasch au aboteni Kürs dörfe dürefühere. Mir hei Rosedekos und Ostergschteck härgschtöt, äs Summertop glismet und Kerzeständer us Tontöpf baschtlet. Uf grosses Interässe stosse jewils üsi Vorträg und Fühelige. So si mir fachkundig vo der Familie Kofmel dür ihre Mühli z Deitige gfuehrt worde, hei e Kochdemo ufem Burehof und e Kochkurs am Wallierhof gha, hei der Holzweg im Thal unsicher gmacht und üs über die wichtige Themene „Patientenverfüegig, Vorsorgeuftrag und Organspänd“ chönne informiere.

Natürlich düe sich ou d Froue ir Iguhau z Recherswil s ganz Jahr fliisig bewege bi üsem Landfroueturne „Bewegen und lösen“.

Üsi ganztägigi Vereinsreis het üs im Mai nach Vevey a schön Gänfersee gfuehrt. Bi wunderbarem Wätter hei mir üs zerscht vom Charlie Chaplin i sini Wäut lo entführe und sis grosse Awäse bewunderet und gnosse. S Mittagässe hei mir denn in Vevey mit grandioser Seesicht zu üs gno. Der Nomitag isch zur freie Verfüegig gschtange und so het

me de die riesigi Arena vom bevorstehende Fête de Vigneron chönne go bestune, go Lädlele oder eifach gmüetlech ar Seepromade verwile. E wunderbare Tag isches gsi, Merci Hedi!

Ou immer ufem Früheligsprogramm stoht üse Obespaziergang, wo mir im letschte Johr amene herrlich laue Summerobe am Burgäschisee bim Bootsstäg vor der Familie Luterbacher hei dörfe verbringe. E Teil vo de Froue si ume See gpaziert, äs anders Grüppeli isch bis zur Boye und wieder retour gschwumme und die angere hei FÜR gmacht, damit mir üsi mitbrochte Sache hei chönne brötle. Äs isch wunderschön gsi am Äschisee und zum Schluss si mir no mit ämene wunderbare Froschkonzärt verwöhnt worde. Merci no einisch der Familie Luterbacher für ihri Gaschtfründschaft und äm Silvia Murer für d Organisation.

Churz nach de Summerferie isch de e usserordentlichi Sitzig ufem Plan gschtange. Füre Backwarestand anlässlich vom Wallierhoftag hei mir no die letschte Details müesse bespräche. Dä Tag het sich de aus chlini Herusforderig entpuppt, hei doch a däm Tag nid vüu Lüt der Wäg zu üsem Schtang gfunge, do d Aktivitäre vom Wallierhof aui bi de nüie Stallige vore stattgfunge hei. Da ig aber sehr ideerichi und flexibli Vorstandsroue ha, hei die churzerhand zwe Chörb mit feine Sache gfüt und hei sich unter d Lüt gmischt und die Bachware ufem ganze Areal so verchouft. Das het zwar grossi Schweissperlene uf der String gä, aber ou e schöne Batze i üsi Vereinskasse. Merci vüu Mou Denise und Melanie. Natürlich möcht ig ou aune Froue danke, wo für üse Stand Züpfe, Brot oder angeri feini Sache bachet hei. Merci vüu Mou!

Wie jedes Johr si ou mir Vorstandsroue wieder echli go Reise. Dasmou si mir ufem Bürgerstock gsi und mit äm Schiff uf Luzern gfahre. E wunderschöne Usflug wo mir hei chönne d Fründschafte pflüge.

S Herbstprogramm het sich so farbig wie d Blätter a de Böim i dere Johreszyt zeigt. Dir heit euch wieder uf vüu schöni, kreativi, interessant und lehrrichi Studen zäme mit üs chönne fröie. So si mir näbscht vilne Baschtelkürs unger angerem informiert worde übere Ibruchschtz, mir si no äs letschts Mou im Bürgerspital ufere Führig gsi und anstatt a ne Wiehnachtsmärit, si mir nach Lahr a Chrysanthema.

Scho fröh freue sich d Froue jewils ou uf die gmüetleche Kaffee- und Limerträffe dür d Wintermönthe düre sowie ufe Lottomatch, wo mir immer im Novämer düe düreführe und jedi Teilnähmerin mind. eis Gschänk im Wärt vo rund 5 Franke mitbringt. Ou ar Adväntsfiir für üse öutere Mitglieder und Ehremitglieder hei mir vüu Froue dörfe begriesse und sie hei sich e Nomitag lang musikalisch und kulinarisch dörfe lo verwöhne.

Natürlich duet üs dürs Johr düre nid nume üses Johresprogramm beschäftige, ou si mir immer wieder a kantonale Aläss ungerwägs. So geit immer e Delegation vo Wasserämter Froue im März a Delegierte Versammlung, wo im letschte Johr z Metzerlen bi Mariastein stattgfunge het.

Denn het der Summerobe stattgfunge, die ehemalige Präsidentinnekonferänz, wo ig und die angere Präsidentinne auso würklech im wahrsten Sinne des Wortes a Gränze gfüert het. Nämlich nach Kleinlützel wo mir bir Isabel Strebel deheime, 100 Meter vor französische Gränze entfärnt im Garte e herrliche Obe verbrocht hei.

Im Herbscht findet jewils ändi Oktober der Bürinne- und Landfrouetag am Wallierhof statt, wo mirs Thema „entrümple, entlaschte, entschleunige“ behandelt hei. Immer wieder e interessante und schöne Tag, dank üsne Froue vom Kantonalvorstand.

Gli drufabe findet de aube d Herschtversammlig statt, wo sich 4 Vorstandsfroue letschte Novämber ufe Wäg is Rest. Guldenthal z Ramiswil gmacht hei. Mir hei s Dorf Ramiswil aber scho längschtens hinger üs glo und si gfahre und gfahre und hei scho wöue zwifile, ob mir de würklech richtig sige, wo de ändlech das Restaurant herrlich gläge, ebe im Guldethal führe cho isch!

Natürlich hei mir ou am 8. Novämber fasch i jedem Dorf wieder Pousemüuch verteilt.

So neigt sich äs intensivs Landfrauenjahr mit truurige aber auch vielne schöne Idrück am Ändi zue.

Achtung verdient, wer vollbring, was er vermag.

So möchte ig euch liebi Froue Danke säge für eures Mitmache und derbi si bi üs Landfroue und mine Vorstandsfroue möcht ig danke für d Organisation vo Kürs oder Aläss, bim Mithäufe a Aläss, merci fürs bache, choche, baschtle und für Jubilare- oder Chrankebsüech. Aus das isch nid säubverständlich und verdient äs grosses Dankeschön!

Obergerlafingen, im Dezember 2019

eui Präsidentin Sabine Havelka